

# INUIT ATAQATIGIIT

## Inatsisartuni



20. juni 2018

Inatsisartut suleriaasianni § 37 imm. 1 naapertorlugu Naalakkersuisunut apeqqut imaattoq matumuuna saqqummiuppara.

### **Naalakkersuisunut apeqqut:**

- 1. Aalisarnermut inatsisissatut siunnersuut siullermeerneqareersoq Inatsisartut suleriaasiat naapertorlugu aatsaallu Inatsisartuni siullermeeqqissasoq Naalakkersuisut isumaqatigaat?**
- 2. Aalisarnermut inatsisissatut siunnersuut Naalakkersuisuniit sutigut qanorlu allangortinniarneqarpa?**
- 3. Aalisarnermut inatsisissaq naalakkersuisuniit allannguuteqartinneqassappat aningaasatigut kingunissai nutaamik naatsorsorneqarsimappat?**
- 4. Aalisarnermi inatsisissatut siunnersuut nutaaq sammineqassappat nunatsinni aalisartut raajarniartut akuersissutaatillit pisassaattillillu amerlinissaat siunertarineqarpa?**
- 5. Ingerlatseqatigiiffiit raajanik aalisartuusut ingerlalluarnermikkut nunatta karsianut aningaasanik isertitsilluarfiusarnera qanoq allannguuteqassasoq Naalakkersuisuniit naatsorsuutigineqarpa?**
- 6. Naalakkersuisut aalisarnermut inatsisissaq pingaaruteqarluinnartoq pillugu nutaamik paasissutissiissutigisariaqartumik saqqummiussassaqarpat?**
- 7. Sinerissap qanittuani rajarniarluni aalisarneq pillugu aalisarfigeqqusaasup avasinnerpaartaatut killiliussa qamma kangerlunni aalisarsinnaaneq allannguutini ilanngunniarneqarpat?**
- 8. Avataasiorluni raajarniarnermi sinerissamiit avasissutsimut killiliussa allangortinniarneqarpa?**
- 9. Raajat ukiumut pisassiissutaasartut (TAC) siunissami pisassat ilai kommuninut pisassiissutinngortinneqarsinnaanerit Naalakkersuisut isumaqatigaat?**
- 10. Kommunit raajanik pisassiissutinik (TAC) ilaannamininnguanilluunniit pisassinneqartalissappata kommuninut innuttaasalu aningaasaqarnikkut siuariaatigissammassuk Naalakkersuisut soqutigalugu suliarisinnaanerpaat?**

**11. Aalisarnermut Inatsisissatut siunnersuut sinerissap qanittuani 15%-it sinnerlugit pisassaattillit pisassaataat utertinneqartussat ataatsimut katillugit raajat tonsinut qassinut naatsorsorneqarpat?**

**12. Aalisarnermut Inatsisissatut siunnersuut avataasiortuni 33,3%-it sinnerlugit pisassaattillit pisassaataat utertinneqartussat ataatsimut katillugit raajat tonsinut qassinut naatsorsorneqarpat?**

**13. Aalisarnermut Inatsisissatut siunnersuut ingerlatseqatigiiffinnut, tunitsivinnut, aalisartunut aamma nunatta avataanut niuernermit sunniuteqartussa q sulisartoqarnikkut qanoq sunniuteqartussaanersoq misissorneqarsimava?**

**14. Nunatta avataanut raajanik tunisaqarnerpaanissatsinnut niuernikkullu aningaasanik isertitaqarnerpaanissatsinnut innarliinnginnissaq pillugu Naalakkersuisut qulaajaanernik pingaarutilinnik ingerlatsisimappat?**

(Inatsisartuni ilaasortaq Aqqaluaq B. Egede, Inuit Ataqatigiit)

#### **Tunngavilersuut:**

Inatsisartut Naalakkersuisullu aalisarnermut inatsisissatut siunnersuummik sammisaqarnissaat nunatta inuisalu aningaasaqarnikkut sulisartoqarnikkullu atugaannut attuumassuteqarluinnarmat sukumiisumik Naalakkersuinikkut sulisoqarsimanersoq, aamma qulaajagassat imaannaanngitsut arlaqartut pisariaqartullu pillugit apeqquteqarnissaq avaqqukkuminaappoq. Tamannalu tunngavigalugu apeqqutit qulaani sammisakka Naalakkersuisuniit erseqqissumik akineqarnissaat pisariaqartippara.

Aalisarnermut Inatsisissaq sutigut tamatigut qulaajaaqqissaarsimalluni sammineqarnissaa pingaarnertut suliassaasutut isigaara. Pingaarnepaajunngilaq sukkanerpaamik suliarinissaa. Pingaarnepaajuvoq sukumiisumik, piffissaqarluni, misissuilluarsimallunilu kukkussutaasinnaasunit pinngitsoortitsiniarsimalluni sulisoqarnissaa. Tamannalu Naalakkersuisuni malinneqarsimanersoq paasiniaarlugu apeqqutit qulaani allassimasakka nassiuppakka.

Neriullunga Naalakkersuisut suliassaq pingaaruteqarluinnartuq pitsaasumik misissuisimallutik, aamma apeqqutit pingaarutillit sapinngisamik tamaasa akissuteqarfigisinnaallugit paasissutissanik katersisimassasut. Inuussutissarsiut pingaarutilerujussuaq illersorsinnaasumik suliarineqarnisassamat.

Apeqqutit ullut qulit qaangiutsinnagit akineqarnissaat kissaatifgaara.